

Եկմայանին: Նա հեղինակն է նաև երգչախմբային և մեներգային մեծաթիվ մշակումների՝ «Հով արեք», «Կեցցե Զեյթուն», «Կիլիկիա», «Ով Հայոց աշխարհ», «Պլպուլն Ավարայրի» ու ժողովրդական դարձած բազում այլ ստեղծագործությունների:

Այս գեղեցիկ ու հոգեպարար ստեղծագործություններն էին վանաձորցի երաժշտասեր հասարակությանը բերել Մայր եկեղեցու սրահ, ուր նրանց ներկայացվեց երգահանի բազմովորտ ստեղծագործություններից ընտրված մի գեղեցիկ փունջ՝ Վանաձորի Ս. Աստվածածին եկեղեցու արական երգչախմբի, Քրիստոնեական Դաստիարակության Կենտրոնի մանկական երգչախմբի (գեղ. ղեկ.՝ Ս. Հարությունյան), Ս. Սարգիս եկեղեցու երգչախմբի (գեղ. ղեկ.՝ Ա. Ճուղուրյան), Բոգդան Հովհաննիսյանի, Մհեր Մելիքյանի, դաշնակահար Կարինե Երիցյանի և ՎՊՄԻ ուսանողների կատարմամբ: Երաժշտական կատարումներին զուգընթաց հանդիսականները ծանոթացան նաև Մակար Եկմայանի կյանքին ու գործունեությանը, որը ներկայացվեց ՎՊՄԻ-ի դասախոս, երաժշտության տեսաբան Հայկուհի Հակոբյանի կողմից:

Հանդիսականներին օրհնության իր խոսքը ուղղեց թեմակալ առաջնորդ Տ. Սեպուհ եպս. Չուլջյանը՝ կոչ անելով պահպանել մեր ազգային մշակույթը, չտրվել օտարածին ու օտարամուտ վարք ու բարքին: «Մակար Եկմայանն այն բացառիկ հայ երգահաններից է, ովքեր հայ ժողովրդական ու հայրենասիրական, հոգևոր երգերի մշակումներով աշխարհին են ներկայացրել հայոց արվեստն ու մշակույթը: Նրա բազմաձայն Պատարագը, որ ամեն կիրակի կատարվում է Հայոց եկեղեցիներում, սնում է հավատավոր հայորդու հոգին, դարերի լիցքը հաղորդում մեր ժողովրդին: Միրով պատրաստ ենք աջակցելու մշակույթի բոլոր գործիչներին, ովքեր ցանկություն ունեն հոգևոր և ազգային երգն ու երաժշտությունը ներկայացնելու հայ հանդիսականին, և տրամադրվում Ս. Գրիգոր Նարեկացի սրահը, որ նախատեսված է այսպիսի հանդիսությունների համար», - այսպես ավարտեց իր խոսքը Սրբազան Հայրը:

Համերգ-հանդիսությանը ներկա էին մարզային ու քաղաքային իշխանությունների ներկայացուցիչներ, արվեստագետներ:

ԼՈՌՈՒ ՈՒՍԱՆՈՂՆԵՐԻ ՄԻՈՒԹՅԱՆ ԱՆԴԱՄՆԵՐԻ ՀԱՆԴԻՊՈՒՄԸ ԳՈՒԳԱՐԱՑ ԹԵՄԻ ԱՌԱՋՆՈՐԴԻ ՀԵՏ

Նորաստեղծ Լոռու Ուսանողների Միության անդամներն իրենց առաջին հանդիպումը նախատեսել էին Գուգարաց թեմի առաջնորդ Տ. Սեպուհ եպս. Չուլջյանի հետ՝ ստանալու համար Սրբազան Հոր օրհնությունը և իրենց առաջիկա ծրագրերը, խնդիրներն ու մտահոգությունները կիսելու թեմակալ առաջնորդի հետ:

Օրհնության և ողջույնի խոսքով դիմելով ուսանողներին՝ Սրբազան Հայրն իր պատրաստակամությունը հայտնեց օգնական ու սատար լինել երիտասարդներին իրենց առաջիկա ծրագրերի իրականացման ճանապարհին, որոնք ուղղված կլինեն Հայրենին կառուցելու նվիրական գործին:

Ներկայացնելով կառույցի ստեղծման նպատակն ու հետագա անելիքները՝ ուսանողները Սրբազան Հորը հարցեր տվեցին՝ կապված Եկեղեցու ծիսակարգի ու դավանանքի, Եկեղեցի - պետություն փոխհարաբերությունների, ներկայումս Հայաստանում գործող աղանդների ու դրանց առաջացման պատճառների մասին, զրոբալիզացիայի և հայ ժողովրդի ու Եկեղեցու վրա վերջինիս ունեցած հետևանքների վերաբերյալ:

Խնդիրները և դրանցից բխող մտահոգությունները բազում էին: Սակայն առաջնայինը և կարևորագույնը ուսանողության համար, որ պետք է ուրախությամբ փաստել, ազգային գիտակցության ու գաղափարախոսության սերմանումն է երիտասարդության մեջ, հայ մարդու՝ իր Հայրենիքին, կրոնին ու Մայր Եկեղեցուն տեր կանգնելը, որին և ուղղված կլինի ուսանողական կազմակերպության հետագա գործունեությունը:

Քաջալերելով ուսանողների նմանօրինակ ձեռնարկումները և պատասխանելով առաջադրված հարցերին՝ Սրբազան Հայրն ի մասնավորի նշեց. «Այսօր ստեղծում ենք նորանոր կառույցներ ու կազմակերպություններ, որոնք իրենց նպաստը պիտի ունենան հանրային կյանքից ներս: Մինչ օրս երիտասարդներն ունեցել են կրավորական կեցվածք, հանդես են եկել դիտորդի դերում՝ առանց բարձրաձայնելու իրենց մտահոգություններն ու խնդիրները պետական և հոգևոր այրերի առջև: Ժաման է ճշտելու, թե ինչ խնդիրներ ու ծրագրեր ունի այսօրվա երիտասարդությունը՝ ի դեմս ձեզ, ինչպես է բացահայտելու իրեն և պատրաստ լինելու ապագայում ստանձնելու պատասխանատվությունը Հայրենիքի ու ժողովրդի առջև, որպեսզի այն չհակասի մեր պետական ու ազգային շահերին»:

Ընդառաջելով ուսանողների ցանկությանը՝ Սեպուհ սրբազանն ուսանողներին առաջարկեց գրավոր ներկայացնել տարբեր ուսումնական հաստատություններում և երիտասարդական կառույցներում առաջիկա հանդիպում-դասընթացների ծրագիրը, որոնք նվիրված կլինեն Հայոց Եկեղեցու պատմությանն ու դավանանքին, ծեսին ու ազգային-եկեղեցական տոներին:

Ստանալով առաջնորդ Սրբազան Հոր օրհնությունը և հանդիպման ընթացքում մշակելով ապագայի նոր ծրագրեր՝ ուսանողները առաջին այս հանդիպումը սկիզբը համարեցին նոր հանդիպումների ու ազգային-հոգևոր դաշտում իրենց առաջիկա գործունեության:

ԴԻՎԱՆ ԳՈՒԳԱՐԱՅ ԹԵՄԻ